

Ebrill 2019



GIG
CYMRU
NHS
WALES

Addysg a Gwella Iechyd
Cymru (AaGIC)
Health Education and
Improvement Wales (HEIW)

**Diweddariad misol yw hwn i bartneriaid a rhanddeiliaid ar ddatblygiad
Addysg a Gwella Iechyd Cymru (AaGIC) gan ei Brif Weithredwr,
Alex Howells.**

**Helpwch ni i ledaenu'r neges am Addysg a Gwella Iechyd Cymru drwy
gylchredeg y bwletinau hyn i'r holl staff.**

Annwyl Gydweithwyr,

Mae'r gwanwyn yma a gyda hynny, ddechrau ein blwyddyn lawn gyntaf fel AaGIC. Mae llawer wedi digwydd ers fy niweddariad diwethaf gyda gwaith ar y gweill i gyflawni ein cynlluniau a'n hamcanion ar gyfer 2019-20. Dyma

ddiweddariad byr ar weithgareddau a rhaglenni allweddol.

Deon Ôl-raddedig

Mae'n bleser gennyf gyhoeddi penodiad Dr Tom Lawson fel Deon Ôl-raddedig AaGIC. Mae Tom yn dechrau yn ei swydd gyda ni ym mis Gorffennaf ar ôl bod yn Ddirprwy Ddeon Meddygol Ôl-raddedig Dros Dro yn Neoniaeth Cymru ac yna AaGIC, ac yn Rhiwmatolegydd Ymgynghorol ym Mwrdd Iechyd Caerdydd a'r Fro.

Mae addysg a hyfforddiant wedi bod o ddiddordeb brwd i Tom ers yn gynnar iawn yn ei yrfa. Adlewyrchir hyn yn y rolau niferus y mae wedi'u cael mewn addysg israddedig ac ôl-raddedig yng Nghymru, ac yn genedlaethol gyda Choleg Brenhinol y Meddygon.

Rydym yn ddiolchgar iawn i'r Athro Peter Donnelly, sydd wedi bod yn Ddeon Ôl-raddedig Dros Dro am yr ychydig flynyddoedd diwethaf. Mae Peter wedi gwneud cyfraniad enfawr wrth lywio Deoniaeth Cymru trwy gyfnod o newid sefydliadol wrth iddo baratoi ar gyfer y cyfnod pontio i AaGIC, ac wrth helpu i sefydlu'r sefydliad newydd. Bydd Peter yn parhau yn y rôl hon wrth ddisgwyl i Tom ddechrau yn yr haf.

Pwyllgor Addysg, Comisiynu ac Ansawdd AaGIC

Yn ein cyfarfod ym mis Mawrth, cytunodd y Bwrdd i sefydlu Pwyllgor Addysg. Bydd y pwyllgor yn cynnwys Aelodau Annibynnol heb unrhyw ddiddordeb uniongyrchol mewn darparwyr hyfforddiant ac addysg AaGIC ar hyn o bryd, gan gynorthwyo AaGIC i liniaru unrhyw berygl gwrthdaro buddiannau posibl. Bydd y Pwyllgor yn cynghori, ac yn rhoi mwy o graffu a sicrwydd i'r Bwrdd yn y meysydd canlynol: addysg, comisiynu addysg a rheoli ansawdd darpariaeth a chontractau addysg. Yn y dyfodol bydd y pwyllgor yn sefydlu mecanweithiau i sicrhau ymgysylltiad rhanddeiliaid â datblygiad y cynllun

addysg a hyfforddiant blynyddol, eleni bydd staff AaGIC yn ymgysylltu â rhanddeiliaid drwy broses dros dro. Gwyliwch y gofod hwn ar gyfer datblygiadau pellach.

Strategaeth Gweithlu Iechyd a Gofal Cymdeithasol

Fel y gwyddoch, rydym yn gweithio gyda Gofal Cymdeithasol Cymru (GCC) i ddatblygu strategaeth gweithlu iechyd a gofal cymdeithasol i Gymru fel argymhelliad allweddol gan Gymru Iachach. Dros yr wythnosau diwethaf, gyda'n partner yr IPC (Sefydliad Gofal Cyhoeddus - Prifysgol Oxford Brookes), rydym wedi bod yn cynnal ymarfer ymgysylltu â rhanddeiliaid i lywio ein drafft cyntaf o'r strategaeth. Yn ogystal, mae uwch gynrychiolwyr o AaGIC a Gofal Cymdeithasol Cymru wedi bod yn mynychu ystod eang o grwpiau cymheiriaid a fforymau eraill i gasglu adborth ac rydym yn ddiolchgar iawn i bawb sydd wedi rhoi o'u hamser.

Os nad ydych eisoes wedi cyfrannu at y strategaeth, gallwch wneud hynny drwy gwblhau ein harolwg ar-lein yn https://www.surveymonkey.co.uk/r/ipc_workforce . Mae'r arolwg yn cau ddydd Gwener 10 Mai 2019.

Gan ddefnyddio'r adborth ymgysylltu byddwn yn gweithio gyda GCC ag IPC i ddatblygu drafft cyntaf y strategaeth. Unwaith y bydd hyn wedi'i gwblhau, bydd cyfle pellach i chi gymryd rhan yn ei ddatblygiad wrth i ni ddechrau ar y cyfnod profi. Ar ôl hyn, ac yn dilyn unrhyw newidiadau angenrheidiol, bydd y strategaeth wedyn yn destun ymgynghoriad cyhoeddus dros fisoedd yr haf.

Cynllun Blynyddol 19/20

Diolch i bawb a roddodd o'u hamser i roi adborth ar ein Cynllun Blynyddol. Rydym wedi cynnwys yr adborth mewn drafft terfynol y cytunwyd arno gan ein Bwrdd. Mae'r cynllun bellach wedi'i gyflwyno i Lywodraeth Cymru i'w

gymeradwyo, ac edrychwn ymlaen at weithio gyda phartneriaid i'w weithredu dros y misoedd nesaf.

Adolygiad strategol o addysg iechyd broffesiynol

Mae AaGIC yn comisiynu ystod eang o gontractau rhaglenni addysg broffesiynol iechyd sy'n dod i ben ddiwedd Gorffennaf 2021. Mae adnewyddu'r rhain yn rhoi cyfle i AaGIC adolygu, ac ystyried, cyfluniad y ddarpariaeth addysg yng Nghymru er mwyn sicrhau ei bod yn gallu cyfarfod anghenion gweithlu iechyd a gofal y dyfodol, ac mae'n cyd-fynd â Strategaeth y Gweithlu sy'n datblygu.

Er mwyn sicrhau bod y contractau yn gweddu orau i'r anghenion hyn, mae AaGIC wedi cyflogi KPMG i gynghori'n annibynnol ar ddarpariaeth addysg a ffurfweddiad yn y dyfodol. Fel rhan o'u gwaith, bydd KPMG yn ymgysylltu'n eang â rhanddeiliaid allweddol, felly rydym yn clywed eich barn. Os hoffech siarad â KPMG yn unigol, cysylltwch ag Emyr Harries ar emyr.harries@KPMG.co.uk

Strategaeth Arweinyddiaeth

Yng Nghynhadledd Cydffederasiwn GIG Cymru, cynhaliodd AaGIC sesiwn lawn ar ddatblygu'r strategaeth arweinyddiaeth, gyda chyflwyniadau gan Loegr, Gogledd Iwerddon a'r Alban. Mae'r pedair cenedl yn cofleidio ymagwedd arweinyddiaeth gyfunol fel bloc adeiladu sylfaenol o drawsnewid. Mae gwaith ar y gweill gyda Gofal Cymdeithasol Cymru, rhanddeiliaid a phartneriaid i ddatblygu strategaeth arweinyddiaeth glir i Gymru, yn unol â strategaeth y gweithlu yn y dyfodol. Byddwn yn rhoi'r wybodaeth ddiweddaraf i chi am gynnydd a sut y gallwch gyfrannu at y strategaeth.

Strategaeth Gyfathrebu ac Ymgysylltu AaGIC

Mae'r strategaeth hon yn cwmpasu ein blwyddyn weithredu lawn gyntaf yn dechrau ar 1 Ebrill 2019. Mae gan y strategaeth ein pwrpas, ein hamcanion a'n gwerthoedd wrth ei wraidd, ac mae wedi'i llunio gan adborth staff a rhanddeiliaid mewn cyfarfodydd a digwyddiadau yn ystod 2018/9. Mae'n ddogfen weithredol y byddwn yn ei hadolygu'n rheolaidd ac yn ei haddasu i adlewyrchu heriau newydd yn ogystal ag adborth. Mae copi o'r strategaeth ar gael ar ein [gwefan](#).

Digwyddiadau rhanddeiliaid

Bydd Hydref yn gweld pen-blwydd blwyddyn gyntaf AaGIC ac i'w nodi rydym yn cynllunio dau ddigwyddiad rhanddeiliaid. Bydd y rhain hefyd yn cyfrannu at ddatblygiad ein Cynllun Integredig Tymor Canolig. Byddwn yn cynnal un digwyddiad yng Ngogledd Cymru ar ddydd Mercher 18 Medi 2019 a'r llall ar ddydd Mawrth 8 Hydref 2019. Byddwn yn cyhoeddi manylion pellach pan allwn ni, ond yn y cyfamser marciwch eich dyddiaduron.

Sioeau Teithiol AaGIC

Gan ddechrau ym mis Mai eleni, bydd Sioe Deithiol AaGIC yn ymweld â Byrddau Iechyd ac Ymddiriedolaethau ledled Cymru i gwrdd â hyfforddeion gofal iechyd, myfyrwyr, addysgwyr a'r rhai sy'n gyfrifol am addysg. Bydd y Sioe Deithiol yn ein galluogi i gyflwyno AaGIC a ni ein hunain, yn ogystal â rhoi cyfle i ni wrando a chael adborth ar brofiadau addysg i'n galluogi i lywio darpariaeth addysg gofal iechyd yng Nghymru yn y dyfodol. Galwch heibio i'n gweld.

Gellir dod o hyd i fanylion pellach a rhestr o arosfannau ar ein gwefan

<https://heiw.nhs.wales/programmes/heiw-roadshow-2019/>

Newidiadau i Dîm Gweithredol AaGIC - Cyfarwyddwr Cyllid a Gwasanaethau Corfforaethol

Mae Eifion Williams yn darparu trefniadau dros dro ar gyfer y Cyfarwyddwr Cyllid, gyda Julie Rogers yn darparu trefniadau dros dro ar gyfer gweddill y portffolio fel rhan o'i rôl Dirprwy Brif Weithredwr. Gobeithiwn hysbysebu am Gyfarwyddwr Cyllid a Gwasanaethau Corfforaethol ar ddiwedd mis Ebrill.

Cysylltwch â Ni

Os hoffech chi gysylltu â ni, gellwch wneud hynny yn:

Addysg a Gwella Iechyd Cymru/ Health Education and Improvement Wales

Tŷ Dysgu

Cefn Coed

Nantgarw

CF15 7QQ

Ffôn: 03300 585 005

Ebost: heiw@wales.nhs.uk

Dymuniadau gorau,

Alex Howells

Prif Weithredwr



Cymraeg



English



Cymraeg



English